

漢魏六朝百三家集

晉

第三十五冊

傅中丞
潘太常

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 35

新中丞集

傅中丞集

傅中丞集題詞

傅休奕剛峻少容貴顯當世老而不
折時晉運方興天子虛已老成喉舌
可以無恙若長虞所處國艱甫殷懲
楊氏執政之萌規汝南輔相之失劾
按驚人榮終司隸直道而行若是多

福鮑子都諸葛少季無其遇也傅氏
諸賦不尚綺麗長虞短篇時見正性
治獄明意賦云吏砥身以存公古有
死而無柔一生骨鯁風尚顯白厯官
威嚴條申職掌御史作箴汲生共勗
司隸布教臥虎立名彼其之子邦之

司直斯人有焉休奕四部六錄文集
百餘湮闕者多長虞著述不富傳文
亦與父埒爲彪爲固不能短長其間
七經詩中毛詩一首雖集句託始無
關言志與尚書同寮詩則告誡臣僕
有孚盈缶韋孟在鄒家風不墜矣

婁東張溥題

傅中丞集目錄

賦

申懷賦 有序

感別賦 有序

明意賦 有序

小語賦

喜雨賦 有序

患雨賦

感涼賦 有序

神泉賦

有序

登芒賦

有序

卞和畫像賦

有序

玉賦

有序

鏡賦

扇賦

羽扇賦

有序

狗脊扇賦

紙賦

相風賦 有序

汙卮賦 有序

櫛賦 有序

燭賦 有序

桑樹賦 有序

梧桐賦

欵冬花賦

又

舜華賦 有序

芸香賦

儀賦
有序

鸚鵡賦

燕賦
有序

斑鳩賦
有序

螢火賦
有序

黏蟬賦
有序

鳴蜩賦

叩頭蟲賦

青蠅賦

蜉蝣賦

芸香賦序

叩頭蟲賦序

蜉蝣賦序

疏

應詔陳言疏

表

駁改社表

重論立社表

辭司隸表

辭丞表

理李含表

又

涼州表

奏

請貶荀愷奏

劾夏侯承奏

劾夏侯駿事

劾王戎奏

又

特進執璧奏

奏事

又

上書

禁奢上書

陳選舉上書

明司隸職掌上書

牋

與汝南王牋

教

司隸教

又

又

草

相諭草

書

與太傅楊駿書

與汝南王亮書

又諫汝南王書

荅楊濟書

又荅楊濟書

荅李斌書

尺牘

荅曹志

頌

皇太子釋奠頌

箴

御史中丞箴

銘

犀鈎銘

有序

杖銘

燭銘

扇銘

碑銘

中郎將曹府君碑銘

誄

襄邑侯誄

詩

孝經詩
二章

論語詩
二章

毛詩詩
二章

周易詩

周官詩二章

左傳詩

與尚書同僚詩

贈褚武良詩

贈崔伏二郎詩

荅潘尼詩并序

荅樂弘詩并序

贈建平太守李叔龍

贈何劭王濟并序

贈太尉司馬虞顯機

失題二首

附錄

本傳

傳中丞集目錄終

傅中丞集

目錄

傅中丞集卷全

晉北地傅咸長虞著

明太倉張東溥閱

賦

申懷賦

有序

余自咸甯謬爲衆論所許補太子洗馬才不稱

職而意常惓然作申懷賦

何天施之弘普厠瓦礫於瓊瑛備東宮之妙選
奉儲君之聖明穆穆清禁濟濟羣英鸞翔鳳集

羽儀上京、芬芳並發、我穢其馨、德音光宣、我累厥聲、豈伊不媿、顧影慙形、雖自百於殞、越懼恩隆、而命輕、命既輕、而才下、諒無補於明時、塞賢哲之顯路、而塵損之日、滋匪耽榮、而忘替實、結戀之有違、忍厚顏於寮類、甘獲戾而受譏、不悟皇恩之彌崇、授大縣乎近畿、畿云近而防遠、情眷眷而含悲、悲惻兼懷、憂慮寔深、雍可南面、千載晞心、微微小子、斯之莫任、莫斯之任、求任在我、將反初服、畢志訓雅、盡烏烏之至情、竭歡敬

於膝下進抗疏以歸誠退抽簪而脂車庶所乞之克從永收迹於蓬廬

感別賦

有序

友人魯庶叔雅量弘濟思心遼遠余自與之相長情相親愛有如同生其後選太子洗馬俄而謬蒙朝私猥忝斯職雖懼不稱而喜得與此子同班共事天下之遇未有若此周旋三載魯生遷尚書郎雖別不遠而情甚悵恨退作茲賦云爾

嘉天地之交泰美萬物之會通悅朋友之攸攝
慕管鮑之遐蹤退以文而會友欽公子之清塵
信同聲之相應意未寫而情親誓稚好之韶齡
分綢繆而日新蘭蕙含芬有時而馨龍驥踠足
有時而征乾道變化時惟大明我我睦友載揚
厥聲降聖宰之旌招曜羽儀之上京贊唐虞之
嘉運超飛躍乎太清佩銀璫於帝側拖紫艾於
天庭瞻宸極之眇眇喜吾子之寵榮無荆玉之
夜觀猥齊景於夜光敢有覬於斯舉欣與子而

並翔天啓其願、自忝蘋蘩、幼則同遊、長則同班、
同心厥職、其臭如蘭、庶績未凝、聖朝疇咨、顯佐
納言、先綜萬機、出順景而爲偶、入闥然而無依、
步虛宇以低迴、想宴笑之餘暉、意躔綿而彌結、
淚雨面而霑衣、

明意賦

有序

侍御史傅咸奉詔治獄作賦用明意云

舍控欵以彌載、令棲遲以淹留、吏砥身以存公、
古有死而無柔、彼背正以從邪、我沒世而是尤、

敷腎腸以爲効兮。豈文飾之足脩。感恩輸命。心
口自滅。加我數年。竭力効節。春秋旣不吾與。日
月忽其不屈。周道今如砥。吉人今是由。材曲今
枉。槁朽木兮難抽。

小語賦

楚襄王登陽雲之臺。景差唐勒宋玉侍。王曰能
爲小語者處上位。景差曰。么茂之子。形難爲象。
晨登蟻埃。薄暮不上。朝炊半粒。晝復得釀。享一
小虱。飽於鄉黨。唐勒曰。攀蚊髯。附蚋翼。我自謂

重彼不極、邂逅有急、相切逼、竄於針孔、以自匿。
宋玉曰、折薛足以爲櫂、舫粒糠而爲舟、將遠遊、
以遐覽、越蟬溺以橫浮、若涉海之無涯、懼湮沒
於洪流、彌數旬而汔濟、陟蟣蟻之崇丘、未升半
而九息、何時達乎杪頭、

喜雨賦

有序

泰始九年、自春不雨、以涉夏節、草木共燃、百姓
以堯有九年之水、湯有七年之旱、恐遭斯運、並
有懼心、聖皇勞慮、分使祈禱、徧于羣望、余以太

子洗馬兼司徒請雨百辟蒞事三朝而大雨降
退作斯賦

祝融熾景義和警轡亢陽火憤野無生類悠悠
億兆同茲慘悴伊我皇之仁德今配燾育於一
儀屢刻躬而勤政今廣請禱於靈祇孰謂天高
其聽不遼孰謂神遠厥應孔昭絜齋致虔於茲
三朝陰鬱拂而騰起陽菴夢而自消飛廉扇谷
風之翼翼靈嶽興慶雲之颺颺遂乃重陰四會
溟邈無垠方中降雨亘夜迄今生我百穀粒我

蒸民昔洪水滔天於唐堯之朝亢旱爲災於殷
湯之世下民其咨莫能俾乂歷稔九七僅免斯
害猶以疇咨爲美譚躬禱爲勛伐

患雨賦

夫何遠寓之多懷患淫雨之有經自流火以迄
今歷九旬而無甯庶太清之垂曜觀日月之光
明雲乍披而旋合雷暫輟而復零將收雷之要
月棄嘉穀於已成前渴焉而不降後患之而弗
晴惟二儀之神化奚水旱之有并湯亢陽於七

載今堯洪汎乎九齡天道且猶若茲况人事之
不平

感涼賦

有序

盛夏困于炎熱熱甚不過旬日而復自涼以時
之涼命親友曲會作賦云爾

踐朱明之中月暑鬱隆以肇興赫融融以彌熾
乃沸海而焦陵獸竄伏於幽林兮鳥垂翼而弗
升汗珠隕於玉體兮粉附身而沾凝於是景雲
晨敷曜靈潛光陰氣盡升凱風載揚忽輕箠於

坐隅兮思暖服於蘭房

神泉賦 有序

余所居庭前有湧泉在夏則冷涉冬而溫溫則水物冬生冷則冰可以過每夏遊之不知歲之有暑耳。

惟茲神泉厥理難原在冬則溫旣夏而寒混混洋洋載清載瀾遂乃壇以文石樹之柳杞密葉雲覆重蔭蔽沚氣冷冷以含涼風肅肅而恒起于時朱明紀運旭日馳光鬱鬱隆暑赫赫太陽

鹽玉體於素波，身淒焉而自清。不知天時之有
暑，忽謂繁霜之隕庭。逮至旻秋，旣逝司寒，騁節
六合，蕭條嚴霜凜冽。河洛輟流，太陰凝結。彼澹
澹而含凍，此灼灼而含熱。綠竹猗猗，荇藻青青。
是託斯茂，是殖斯榮。

登芒賦

有序

左光祿大夫濟北侯荀公前喪元妃，及失令子，
葬於西芒，有以感懷而作斯賦。

何天道之難忱，信厥命之靡常。匪彼生之不辰，

亦大夫之多殃。惟濟北之初載。夙遘旻而逢罹。
興瓜瓞之綿綿。飛英聲以風馳。庶家道之克昌。
永保祚於螽斯。愠無妄之爲災。怨上皇之有違。
在德門之方隆。乃降厲於元妃。蘭房閨其無主。
衆孤煢而莫依。孔臨川以永歎。趙有感於九原。
覽登芒之哀賦。諒聖賢之同情。

卞和畫像賦

有序

先畫卞和之像者。雖其事在素定。見其涕血殘
別之形。情以淒然。至臧文仲知柳下惠之賢。而

不與立。卞和自刖以相證。相去遠矣。戲畫其像於卞子之旁。特赤其面以示猶有慙色。辭曰。惟年命之適短。速流光之有經。疾沒世而不稱。貴立身而揚名。既銘勒於鐘鼎。又圖像於丹青。覽光烈之攸畫。覩卞子之容形。泣泉流以雨下。灑血面而瀦纓。痛兩趾之雙刖。心惻悽以傷情。雖髮膚之不毀。覺害仁以偷生。向厥趾之不刖。孰夜光之見明。人之不同。爰自在昔。臧知柳而不進。和殘軀以證璧。

玉賦 有序

易稱乾爲玉、玉之美與天合德、其在玉藻、仲尼論之備矣、非復鄙文所可稱述、

萬物資生、玉稟其精、體乾之剛、配天之清、故能珍嘉在昔、實用罔極、夫豈君子之是比、蓋乃王度之所式、其爲美也若此、當其潛光荆野、抱璞未理、衆視之以爲石、獨見知於卞子、曠千載以遐棄、倏一旦而見齒、爲有國之偉寶、禮神祇於明祀、豈連城之足云、嘉遭遇乎知己、知己之不

可遇，譬河清之難俟，旣已若此，誰亦泣血而別
趾。

鏡賦

順陰位於西裔，採秋金之剛精，醮祝融以致虔
命，歐冶而是營，晞日月之光烈，儀厥象乎曜靈，
清邈明水，景若朝陽，不將不迎，應物無方，不有
心於好醜，而衆形其必詳，同實錄於良史，隨善
惡而是彰，猗猗淑媛，戔戔后妃，眷春榮之零悴，
懼玉顏之有衰，盻清揚而自鏡，競崇姱以相暉。

若乃雲髻亂於首、頰黛渝於色、設有乏於斯器、
今孰厥貌之能飾、與喑瞽而同昧、今近有面而
不識、君子知貌之不可以不飾、則內省而自箴、
既見前而慮後、則祗畏於幽深、察明明之待瑩、
則以此而洗心、睹目觀之有瑕、則稽訓於儒紳、
夫然尚何厥容之有慢、而厥思之有淫、

扇賦

天道行而不息、四節代以相尋、背青春之令月、
踐朱夏於斯今、熱融融以太甚、孰赫赫之可任、

汗珠隕以外流、氣鬱結而內沈、庶凱風之自南、
競清嘯而啓衿、怨微飄之不興、恨喬木之無陰、
搖輕扇之苒弱、手纔動而慙心、心取慙於捲握、
尚何希乎北林下濟億兆、上甯侯王、是曰安衆、
清暑作涼、蒙貴幸於斯時、無日夜而有忘、謂洪
恩之可固、終靡弊於君旁、火星忽以西流、悲風
起乎金商、秋日淒淒、白露爲霜、體歛然以思暖、
御輕裘於溫房、猥棄我其若遺、去玉手而潛藏、
君背故而向新、非余身之無良、哀徒勞而靡報、

獨懷怨於一方

羽扇賦

有序

吳人截鳥翼而搖風。既勝於方圓二扇。而中國莫有生意。滅吳之後。翕然貴之。其辭曰

鳳凰于飛。翩翩其羽。况靈體以遐翔。匪六翮其焉舉。感扇揚之興風。宜收之以清暑。彼安衆之云妙。差剖箴於毫縷。體荏苒以輕弱。侔縞素於齊魯。此因資以爲用。不假裁於規矩。雖靡飾於容好。亦差池而有序。上比列於南箕。下等美於

傅中丞集

卷全

十

簾甫

北堂書抄傳咸羽扇賦云熾九日之隆赫然高燎于扶桑熱熙天而灼地沸巨海而

成湯

狗脊扇賦

蓋卑以自居。君子之經。孤寡不穀。王侯修名。尚不媿狗脊之爲號。亦焉顧九華之妙形。

紙賦

蓋世有質文。則理有損益。故禮隨時變。而器與事易。旣作契以代結繩。今又造紙以當策。猶純儉之從宜。亦唯變而是適。夫其爲物。厥美可珍。

廉方有則體潔性真含章蘊藻實好斯文取彼
之淑以爲已新攬之則舒舍之則卷可屈可伸
能幽能顯若乃六親乖方離羣索居鱗鴻附便
援筆飛書寫情於萬里精思於一隅

相風賦

有序

相風之賦蓋以富矣然辭義大同唯中書張令
以太史相風獨無文飾故特賦之太僕寺丞武
君賓樹一竹於前庭其上頗有樞機插以雞毛
于以占事知來與彼無異斯乃簡易之至有殊

太史相風。張氏之賦。非其至也。

籊籊竹竿。在武之庭。厥用自然。旣脩且貞。插羽其首。丹漆弗營。經之營之。不日而成。

汗卮賦

有序

人有遺余琉璃卮者。小兒竊弄。墮之不索。意旣惜之。又感物之汗辱。乃喪其所以爲寶。况君子行身而可以有玷乎。

有金商之瑋寶。稟乾剛之涓精。歎春暉之定色。越冬冰之至清。爰甄陶以成器。逞異域之殊形。

猥陷身於醜穢豈厥美之不惜與觴杓之長辭
曾瓦匱之不若

櫛賦

有序

大才治世猶櫛之理髮也理髮不可無櫛治世
不可無才賦曰
我嘉茲櫛惡亂好理一髮不順實以爲恥雖日
用而匪懈不告勞而自已苟以理而委任期竭
力而沒齒

燭賦

余治獄至長安在遠多懷與同行夜飲以忘愁
顧帷燭之自焚以致用亦有殺身以成仁矣賦
曰

蓋泰清垂象匪日不光向晦入冥匪火不彰故
六龍銜燭於北極九日登曜於扶桑日中則昃
月虧於望時邁靡停晝不于常背三接之昭昭
卽旋開之有傷何遠寓之多懷患冬夜之悠長
獨耿耿而不寐待鷄鳴之未央徒伏枕以展轉
起燃燭於閑房揚丹輝之煒燁熾朱焰之煌煌

俾幽夜而作晝、繼列景乎朝陽、慨顧景以增歎、孰斯愁之可忘、嘉湛露之悵悵、遂命樽而設觴、爾乃延僚屬、酌醇清、講三墳、論五經、高談既倦、引蒲行盈、樂飲今夕、實慰我情

桑樹賦

有序

世祖昔爲中壘將軍、於直廬種桑一株、迄今三十餘年、其茂盛不衰、皇太子入朝、以此廬爲便坐、賦曰

伊茲樹之僥倖、蒙生生之渥惠、降皇躬以斯植、

遂弘茂於聖世、厥茂伊何、其大連尋、脩柯遠揚、
洪條梢慘、布繁枝之沃若、播密葉以垂陰、蔭華
寓而作涼、清隆暑之難任、以厥樹之巨偉、登九
日於朝陽、且積小以高大、生合抱於毫芒、猶帝
道之將升、亦累德以彌光、湯躬禱於斯林、用獲
雨而興商、惟皇晉之基命、爰於斯而發祥、從皇
儲於斯館、物無改於平生、心惻切以興思、思有
感於聖明、步徬徨以周覽、庶髣髴於儀彤、

梧桐賦

美詩人之攸貴兮，覽梧桐乎朝陽。蔚莘莘以萋萋兮，鬱株列而成行。夾二門以駢羅，作館寓之表章。

欵冬花賦

有序

余曾逐禽登于北山，于時仲冬之月也。冰凌盈谷，積雪被崖。顧見欵冬煒然始敷，賦曰：

惟茲奇卉，欵冬而生。原厥物之載育，稟涓粹之至精。用能託體固陰，利此堅貞。惡朱紫之相奪，患居衆之易傾。在萬物之並作，故韜華而弗逞。

逮皆死以枯槁獨保質而全形

又

華艷春暉旣麗且殊以堅冰爲膏壤吸霜雪以
自濡非天然之真貴曷能彌寒暑而不渝

舜華賦

有序

佳其日新之美故種之前庭而爲之賦

覽中唐

奇之

樹稟冲粹之至精應青春而敷蘖逮

朱夏而誕英布天天之纖枝發灼灼之殊榮紅

葩紫蒂翠葉素莖含暉吐曜爛若列星朝陽照

灼以舒暉，逸藻采粲而光明。罄天壤而莫儷，何
菱華之足榮。

芸香賦

序附後

携昵友以逍遙，今覽偉草之敷英。慕君子之弘
覆兮，超託軀於朱庭。俯引澤于丹壤兮，仰汲潤
乎泰清。繁茲綠蕊，茂此翠莖。葉茝蓀以纖折兮，
枝婀娜以迴榮。象春松之含曜兮，鬱蒼蔚以葱
青。

儀賦

有序

鷦鷯賦者，廣武張侯之所造也。以其形微處卑。物莫之害也。而余以爲物生則有害有害而能免所以貴乎才智也。夫鷦鷯既無智足貴亦禍害未免免乎禍害者其唯儀鳳也。辭曰

仰天文以彌觀兮，覽神象乎太清。伊儀鳳之誕育兮，稟朱行之淳精。故能體該衆妙，德備五靈。穢維塵之紛濁兮，患俗網之易嬰。心眇眇其悠遠兮，意飄飄以遐征。翔寥廓以輕舉兮，凌清霄而絕形。若乃龍飛九五時，惟大明闡隆正道。旣

和且平感聖化而來儀兮讚簫韶於九成隨時
宜以行藏兮諒出處之有經豈以美而賈害兮
固以德而見榮曠千載而莫覩兮忽翻爾而來
庭應龍至今庶有感於斯誠而君子之是忽兮
賦微物以申情雖綺靡之可翫兮悲志大之所
營敢砥鈍於未蹤兮則瓦礫於瑤瓊

鸚鵡賦

有金商之奇鳥處壠坻之高松謂崇峻之可固
然以慧而入籠披丹脣以授音亦尋響而應聲

眇明眸以承顏側聰耳而有聽口纔發而輕和
密晷景而隨形言無徃而不復似探幽而測冥
自嘉智於君子足取愛而揚名

燕賦 有序

有言燕今年巢在此明歲故復來者其將逝翦
爪識之其後果至焉

燕燕于飛差池其羽何詩人之是興信進止之
有序秋背陰以龍潛春晞陽而鳳舉隨時宜以
行藏似君子之出處惡焚巢之凶醜患林野之

多阻。諒鳥獸之難羣，非斯人而誰與？惟里仁之爲美，託君子之堂寓。逮來春而復旋，意眷眷而懷舊。一委身乃無餘，豈改適而更赴。

斑鳩賦

有序

余秋蔚然成林，閒居無爲，有時遊之，顧見斑鳩，音聲可悅，於是捕而畜之。旣以馴擾，出之於籠，無何失去，後時時一來，飛翔貽如有戀，聊爲之賦。

集茂樹之蔭蔚，登弱枝以容與。體郁郁以敷文，

音邕邕而有序情欽樂而是悅遂籠之於前寓
爾乃飲以神泉食之稻粱朝憩椒塗夕宿蘭房
時連翩於庭阿見飛燕之頡頏慨感物而哀鳴
聲楚切以懷傷仰華林而矯翼紛翮逝而高翔

螢火賦

有序

余曾獨處夜不能寐顧見螢火遂有感於是執
以自照而爲之賦其辭曰

潛空館之寂寂今意遙遙而靡甯夜耿耿而不
寐今憂悄悄而傷情哀斯火之湮滅今近腐草

而化生、感詩人之悠懷兮、覽熠燿于前庭、不以
姿質之鄙薄兮、欲增輝乎太清、雖無補於日月
兮、期自照於陋形、當朝陽而戢景兮、必宵昧而
是征、進不競於天光兮、退在晦而能明、諒有似
於賢臣兮、於踈外而盡誠、蓋物小而喻大兮、固
作者之所旌、假乃光而爾熾兮、庶有表乎潔貞、

黏蟬賦

櫻桃爲樹則多陰、爲果則先熟、故種之於廳事
之前、時以盛暑、逍遙其下、有蟬鳴焉、仰而見之、

聊命黏取以弄小兒退惟當蟬之得意於斯樹
不知黏之將至亦猶人之得意於富貴而不虞
禍之將來也

有嘉果之珍樹蔚弘覆於我庭在赫赫之隆暑
獨蕭蕭而自清遂寓目以周覽見鳴蜩於纖枝
翳翠葉以長吟信厥樂之在斯苟得意於所歡
曾往黏之莫知匪爾命之遵薄坐偷安而忘危
嗟悠悠之耽寵請茲覽以自規

有噫噫之鳴蜩于台府之高槐物處陰而自慘
奚厥聲之可哀秋日悽悽兮感時逝之若頽曷
時逝之是感兮感年歲之我催孰知命之不憂
詠梁木之有摧生世忽兮如寓求富貴於不回
且明明以在公惟忠讜之是與佚履道之坦坦
登高衢以自棲

叩頭蟲賦

序附後

蓋齒以剛克而盡舌存以其能柔強梁者不得
其死執雌者物莫之讐無咎生於惕厲悔愆來

亦有由。仲尼唯諾於陽虎。所以解紛而免尤。韓
信非爲懦兒。出胯下而不羞。何茲蟲之多畏。人
纔觸而叩頭。犯而不校。誰與爲讐。人不我害。我
亦無憂。彼螳螂之舉斧。豈患禍之能禦。此謙卑
以自牧。乃無害之可賈。將斯文之焉貴。貴不遠
而取譬。雖不能觸類是長。且書紳以自示。旨一
日而三省。恒跼蹐以祇畏。然後可以蒙自天祐
之吉。無不利。

幸從容以閒居。且遊心於典經。覽詩人之有造。
刺青蠅之營營。無纖芥之微用。信作害之不輕。
既反白而爲黑。恒懷蛆以自盈。穢美玉之鮮潔。
蠹嘉肴之芳馨。蒲堂室之薨薨。孰閨寓之得情。
有生之薄。是曰蜉蝣。育微微之陋質。羌采采而
自脩。不識晦朔。無意春秋。取足一日。尚又何求。
戲停淹而委餘。何必江湖而是遊。

芸香賦序

蜉蝣賦

序附後

賦

序

先君作芸香賦詞美高麗有覩斯卉蔚茂馨香
同遊使余爲序

叩頭蟲賦序

叩頭蟲蟲之微細者然教之輒叩頭人以其叩
頭傷不祥故莫之害也

蜉蝣賦序

讀詩至蜉蝣感其雖朝生暮死而能脩其翼可
以有興遂賦之

疏

應詔陳言疏

陛下處至尊之位而脩布衣之事親覽萬機勞心日昃在昔帝王躬自菲薄以利天下未有踰陛下也然泰始開元以暨于今十有五年矣而軍國未豐百姓不贍一歲不登便有菜色者誠由官衆事殷復除猥濫蠶食者多而親農者少也臣以頑疎謬忝近職每見聖詔以百姓饑饉爲慮無能云補伏用慙慙敢不自竭以對天問

舊都督有四。今并監軍。乃盈於十。夏禹敷土。分爲九州。今之刺史。幾向一倍。戶口比漢十分之一。而置郡縣更多。空校才門。無益宿衛。而虛立軍府。動有百數。五等諸侯。復坐置官屬。諸所寵給。皆生於百姓。一夫不農。有受其饑。今之不農。不可勝計。縱使五稼普收。僅足相接。暫有災患。便不繼贍。以爲當今之急。先并官省事。靜事息役。上下用心。惟農是務也。

表

駁改社表

太康九年改建宗廟而社稷壇與廟俱徙乃詔曰社實一神其并二社之禮

祭法二社各有其義天子尊事郊廟故冕而躬耕也者所以重孝享之粢盛致殷薦於上帝也穀梁傳曰天子親耕以供粢盛親耕謂自報自爲立社者爲籍而報也國以人爲本人以穀爲命故又爲百姓立社而祈報焉事異報殊此社之所以有二也王景侯之論王社亦謂春祈籍

田、秋而報之也。其論太社則曰：王者布下圻內，爲百姓立之，謂之太社，不自立之於京師也。景侯此論，據祭法大夫以下成羣立社曰置社。景侯解曰：今之里社是也。景侯解祭法，則以置社爲人間之社矣。而別論復以太社爲人間之社，未曉此旨也。大社，天子爲人而祀，故稱天子社。郊特牲曰：天子太社，必受霜露風雨，夫以羣姓之衆，王者通爲立社，故稱太社。若夫置社，其數不一。蓋以里所爲名。左氏傳盟于清邱之社，是

也人間之社。旣已不稱太矣。若復不立之京都。當安所立乎。祭法又曰。王爲羣姓立七祀。自爲立七祀。言自爲者。自爲而祀也。爲羣姓者。爲羣姓而祀也。太社與七祀。其文正等。說者窮此。因云墳籍但有五祀。無七祀也。按祭五祀。國之大祀。七者小祀。周禮所云。祭凡小祀。則墨晁之屬也。景侯解大厲曰。如周杜伯。鬼有所歸。乃不爲厲。今云無二社者。稱景侯祭法。不謂無二。則曰口傳無其文也。夫以景侯之明。擬議而後爲解。

而欲以口論除明文如此非但二社當是思惟
景侯之後解亦未易除也前被勅尚書召誥社
于新邑唯一太牢不二社之明義也按郊特牲
曰社稷太牢必援一牢之文以明社之無二則
稷無牲矣說者則曰舉社以明稷何獨不可舉
一以明二國之大事在祀與戎若有過而除之
不若過而存之况存之有義而除之無據乎周
禮封人掌設社壇無稷字今帝社無稷蓋出於
此然國主社稷故經傳動稱社稷周禮王祭稷

則締冕。此王社有稷之文也。封人設壇之無稷字說者以爲略文從可知也。謂宜仍舊立二社而加立帝社之稷。

重論立社表

時成粲議稱景侯論太社不立京都欲破鄭氏學咸重表

如粲之論景侯之解文以此壞大雅云乃立豕土毛公解曰豕土太社也景侯解詩卽用此說禹貢惟土五色景侯解曰王者取五色土爲太社封四方諸侯各割其方色王者覆四方也如

此太社復爲立京都也。不知此論從何出。而與解乖。上違經記明文。下壞景侯之解。臣雖頑蔽少長學問。不能默已。謹復續上

辭司隸表

臣旣駑弱。不勝重任。加在哀疚。假息日闕。陛下過意。授非所堪。披露丹款。歸窮上聞。謬詔旣往。終然無改。臣雖不能滅身以全禮教。義無覲然。虛忝隆寵。前受嚴詔。視事之日。私心自誓。隕越爲報。以貨賂流行。所宜深絕。切勅都官。以此爲

先而經彌日月。未有所得。斯由陛下有以獎厲
慮於愚戇。將必死繫。故自掩檢以避其鋒耳。在
職有日。旣無赫然之舉。又不應弦垂翅。人誰復
憚。故光祿大夫劉毅爲司隸。聲震內外。遠近清
肅。非徒毅有王臣匪躬之節。亦由所奏見從。威
風得伸也。

辭丞表

左丞職輕事重。以賤制貴。所以難居。臣以闇劣
猥忝斯任。愧於不稱。懼罪之及。夙夜惶恐。寢食

無甯

理李含表

臣州秦國郎中令始平李含忠公清正才經世務實有史魚秉直之風雖以此不能協和流俗然其名行峻厲不可得掩二郡並舉孝廉異行尚書郭奕臨出含寒門少年而奕超爲別駕大保衛瓊辟含爲掾每語臣曰李世容當爲晉匪躬之臣秦王之薨悲慟感人百僚會喪皆所目見也今以含俯就王制謂之背戚居榮奪其中

正。天王之朝。旣葬不除。藩國之喪。旣葬而除。藩國欲同不除。乃當責引尊準卑。非所宜言耳。今天朝吉于上。欲令藩國服于下。此爲藩國之義。隆。而天朝之禮薄也。又云。諸王公皆終喪禮。甯盡乃敘。明以喪制宜隆。務在敦重也。夫甯盡乃敘。明以哀其病耳。異於天朝制使終喪。未見斯文。國制旣葬而除。旣除而祔。爰自漢魏迄于聖晉。文皇升遐。武帝崩殂。世祖過哀。陛下毀頓。銜疚諒闇。以終三年。率土臣妾。豈無攀慕遂服之。

心○實○以○國○制○不○可○而○踰○故○於○既○葬○不○敢○不○除○天
王○之○喪○釋○除○於○上○藩○國○之○臣○獨○遂○于○下○此○不○可
安○復○以○秦○王○無○後○含○應○爲○喪○主○而○王○喪○既○除○而
祔○則○應○吉○祭○因○曰○王○未○有○廟○主○不○應○除○服○秦○王
始○封○無○所○連○祔○靈○主○所○居○卽○便○爲○廟○不○問○國○制
云○何○而○以○無○廟○爲○貶○以○含○今○日○之○所○行○移○博○士
使○案○禮○文○必○也○放○勛○之○殂○過○密○三○載○世○祖○之○崩
數○旬○卽○吉○引○古○繩○今○闔○世○有○貶○何○但○李○含○不○應
除○服○今○也○無○貶○王○制○故○也○聖○上○諒○闇○哀○聲○不○輟

股肱近侍。猶宜心喪。不宜便行婚娶歡樂之事。而莫云者。豈不以大制不可而曲邪。且前以舍有王喪。上爲差代。尚書勅王葬日在近。葬訖。舍應攝職。不聽差代。葬訖。舍猶躊躇。司徒屢罰。訪問。蹶舍攝職。而隨擊之。此爲臺勅府符。陷舍於惡。若謂臺府爲傷教義。則當據正不正符勅。唯舍是貶。舍之困躓。尚足惜乎。國制不可偏耳。又舍自以隴西人。雖戶屬始平。非所綜悉。自初見使爲中正。反覆言辭。說非始平國人。不宜爲中

正後爲郎中令又自以選官引臺府爲比以讓
常山太守蘇韶辭意懇切形于文墨含之固讓
乃在王未薨之前葬後躊躇窮於對罰而攝職
耳臣從弟祇爲州都督意在欲隆風教議含已
過不良之人遂相扇動冀挾名義法外致案足
有所邀中正龐騰便割含品臣雖無祢大夫之
德見含爲騰所侮謹表以聞乞朝廷以時博議
無令騰得妄弄刀尺

李含爲秦國郎中令司徒選含領始平中正秦王東

薨含依臺儀葬訖除喪尚書奏含不應除喪咸上表理之

又

臣以爲國之大制不可而偏秦國郎中令李含承尚書之勅奉喪服之命旣葬除服而中正龐騰無所據仗貶含品三等謂此未值漢魏以來施行之制具以表聞未嘗朝廷當云何騰等之論以秦王無後前又有詔以此謂含不應除服愚謂諸侯之制不得異于天朝就秦王有嗣于制亦自應除且秦王無後乃前有詔朝野莫不聞知而尚書下勅葬訖含自應攝職不應差代

尋舉爲臺郎又司徒摘罰訪問催令攝職如此臺府亦皆謂含旣葬應除也相是純臣羣臣之首奏令含釋服亦無餘疑至於含除便獨爲罪竊謂有負于情臣之在事小大欲盡使在優崇况國之大制當乘將來心所不安而不敷寫謹重以聞乞中書見詰猶百慮當一得也

涼州表

涼州民先辦靴從軍之物然後作衣

奏

請貶荀愷奏

死喪之戚、兄弟孔懷、同堂亡隕、方在信宿、聖恩矜憫、聽使臨喪、詔未下而便以行、造急諂媚之敬、無友于之情、宜加顯貶、以隆風教。

劾夏侯承奏

少府夏侯承、取官田立私屋、近小人、委以家計、令工匠竊盜官物、附益于私、所營唯利醜問、充斥、大臣穢濁、無以爲訓。

劾夏侯駿事

令史張濟案行城東見有新立屋間箝篴障二十丈推問是少府夏侯駿所作請免駿官

劾王戎奏

書稱三載考績三考黜陟幽明今內外羣官居職未期而戎奏還旣未定其優劣且送故迎新相望道路巧詐由生傷農害政戎不仰依堯舜典謨而驅動浮華虧敗風俗非徒無益乃有大損宜免戎官以敦風俗

又

戎備位台輔兼掌選舉不能謐靜風俗以凝庶績至令人心傾動開張浮競中郎李重李義不相匡正請免戎等官

特進執璧奏

公品第一執珪坐侍臣之上特進品第二執皮帛坐侍臣之下以有舊制今啓特進宜執璧繼公

奏事

尚書舊奏給介士二百人人給大銅口刀各一枚

又

司隸中丞得糾大子而不得糾尚書臣所未譬
朝廷無以易之

上書

禁奢上書

臣以爲穀帛難生而用之不節。無緣不匱。故先王之化天下。食肉衣帛。皆有其制。竊謂奢侈之費。甚於天災。古者堯有茅茨。今之百姓。競豐其屋。古者臣無玉食。今之賈豎。皆厭粱肉。古者后妃乃有殊飾。今之婢妾。被服綾羅。古者大夫乃不徒行。今之賤隸。乘輕驅肥。古者人稠地狹。而有儲蓄。由於節也。今者土廣人稀。而患不足。由

於奢也。欲時之儉。當詰其奢。奢不見詰。轉相高尚。昔毛玠爲吏部尚書。時無敢好衣美食者。魏武帝歎曰。孤之法。不如毛尚書。今使諸部用心。各如毛玠。風俗之移。在不難矣。

陳選舉上書

臣咸以爲夫興化之要在於官人。才非一流。職有不同。譬諸林木。洪纖枉直。各有攸施。故明揚逮于仄陋。疇咨無拘。內外之任。內外之任。出處隨宜。中間選用。惟內是隆。外舉旣頽。復多節目。

競內薄外。遂成風俗。此弊誠宜亟革之。當內外
通塞。無所偏耳。旣使通塞無偏。若選用不平。有
以深責。責之苟深。無憂不平也。且膠柱不可以
調瑟。况乎官人而可以限乎。伏思所限者。以防
選用不能出人。不能出人。當隨事而制。無須限
法。法之有限。其於致遠。無乃泥乎。或謂不制其
法。以何爲責。臣聞刑懲小人。義責君子。君子之
責在心。不在限也。正始中。任何晏以選舉。內外
之衆職。各得其才。粲然之美。於斯可觀。如此非

徒御之以限法之所致。乃委任之由也。委任之
懼甚於限法。是法之失。非已之尤。尤不在已。責
之無懼。所謂齊之以刑。人免而無恥者也。苟委
任之。一則慮罪之及。二則懼致怨謗。已快則朝
野稱詠。不善則衆惡是歸。此之戰戰孰與倚限
法以苟免乎。

明司隸職掌上書

按令御史中丞督司百僚。皇太子以下其在行
馬內有違法憲者彈糾之。雖在行馬外而監司

不糾亦得奏之。如今之文行馬之內有違法者，謂禁防之事耳。宮內禁防，外司不得而行。故事，施中丞，今道路橋梁不脩，鬪訟屠沽不絕。如此之比，中丞推責州坐，卽今所謂行馬內語施於禁防。旣云中丞督司百僚矣，何復說行馬之內乎？旣云百僚而不得復說行馬之內者，內外衆官，謂之百僚，則通內外矣。司隸所以不復說行馬內外者，禁防之事已於中丞說之故也。中丞司隸俱糾皇太子以下，則共對司內外矣。不爲

中丞專司內百僚，司隸專司外百僚，自有中丞司隸以來，更互奏內外衆官，惟所糾，得無內外之限也。而結一旦橫挫臣，臣前所以不羅縷者，冀因結奏，得從私願也。今旣所願不從，而勅云：「但爲過耳，非所不及也。」以此見原，臣忝司直之任，宜當正已率人。若其有過，不敢受原，是以申陳其愚。司隸與中丞俱共糾皇太子以下，則從皇太子以下，無所不糾也。得糾皇太子，而不得糾尚書，臣之間塞旣所未譬。皇太子爲在行馬。

之內耶。皇太子在行馬之內。而得糾之。尚書在
行馬之內。而不以糾。無有此理。此理灼然而結。
以此挫臣。臣可無恨耳。其於觀聽。無乃有怪邪。
臣識石公前在殿上脫衣。爲司隸荀愷所奏。先
帝不以爲非。于時莫謂侵官。今臣裁糾尚書。而
當有罪乎。

何中文集

卷全

三十四

彈文

奏彈司隸荀愷文

死喪之戚。兄弟孔懷。同堂亡隕。方在信宿。聖恩
矜憫。聽使臨喪。詔未下而便以行造。急詔媚之
敬。無友于之情。宜加顯貶。以隆風教。

牋

與汝南王牋

衛伯輿貴妃兄子誠有才章應作臺郎然未得
東宮官屬東宮官屬前思楊駿親理塞路今有
伯輿復越某作郎一犬吠形羣犬吠聲懼於羣
吠遂至回聽

傅中丞集

卷全

三

池縣至回部

前漢書卷之九十一 大宛列傳第六十一

自漢惠帝時匈奴與漢和親匈奴始與漢通

好戰其子孫有欲與漢通者匈奴亦與之通

與西南夷

教

司隸教

司隸校尉。舊號臥虎。誠以舉綱而萬目理。提領而衆毛順。

又

聞南方有蜀嫗作茶粥賣之。廉事歐其器具。使無爲賣餅于市。而禁茶粥。以困老姥。獨何哉。

又

屠牛酤酒。鑿錢作錫。皆有損害。

草

相諭草

黃紙故事鋪不上皆取急與自頃多廢輒皆移
病前門自今以後尚書鋪上不朽急

朽音鳥引也又音枯

書

與太傅楊駿書

咸爲尚書左丞、惠帝卽位、駿輔政、咸言於駿、

事與世變、禮隨時宜、諒闇之不行、尚矣、由世道
彌薄、權不可假、故雖斬焉在疚、而躬覽萬機也、
逮至漢文、以天下體大服重難久、遂制旣葬而
除、世祖武帝雖大孝、烝烝亦從時釋服、制心
喪三年、至於萬機之事、則有不遑、今聖上欲委
政於公、諒闇自居、此雖謙讓之心、而天下未以

爲善天下未以爲善者以億兆颺颺戴仰宸極
聽於冢宰懼天光有蔽人心旣已若此而明公
處之固未爲易也竊謂山陵之事旣畢明公當
思隆替之宜周公聖人猶不免謗以此推之周
公之任旣未易而處况聖上春秋非成王之年
乎得意忘言言未易盡苟明公有以察其恫欵
言豈在多

與汝南王亮書

亮輔政爲太宰欲取悅衆論誅楊駿之
力督將奚者千八十一人咸爲御史中

丞致
書

咸以爲太甲成王年在蒙幼故有伊周之事聖
人且猶不免疑况臣旣不聖主非孺子而可以
行伊周之事乎。上在諒闇聽於冢宰而楊駿無
狀便作伊周自爲居天下之安所以至死其罪
旣不可勝亦是殿下所見駿之見討發自天聰
孟觀李肇與知密旨耳至於論功當歸美於上
觀等已數千戶縣侯聖上以駿死莫不欣悅故
論功寧厚以敘其歡心此羣下所宜以實裁量。

而遂扇動東安封王、孟李郡公、餘侯伯子男，旣
妄有加，復又三等超遷，此之熏赫震動天地，自
古以來，封賞未有若此者也。無功而厚賞，莫不
樂。國有禍，禍起當復有大功也。人而樂禍，其可
極乎？作此者，皆由東安公謂殿下至止，當有以
正之。正之以道，衆亦何所怒乎？衆之所怒，在於
不平耳。而今皆更倍論，莫不失望，咸之愚冗，不
惟失望而已。竊以爲憂，又討駿之時，殿下在外，
實所不綜，今欲委重，故令殿下論功，論功之事，

實未易可處。莫若坐觀得失，有居正之事宜也。
殿中郎孟觀、李肇構、楊太后父駿、干賈后、廢駿而東安公孫率衆討駿，進封東安王。

又諫汝南王書

咸復以亮輔政，專權，又諫之。

楊駿有震主之威，委任親戚，此天下所以誼謹。今之處重，宜反此失。謂宜靜默頤神，有大得失，乃維持之。自非大事，一皆抑遣。比四造詣及經過尊門，冠蓋車馬，填塞街衢。此之翕習，旣宜弭息。又夏侯長容奉使爲先帝請命，祈禱無感，先

帝崩背宜自咎責而自求請命之勞而公以爲少府私竊之論云長客則公之姻故至於此一大吠形羣犬吠聲懼於羣吠遂至叵聽也咸之爲人不能面從而後言嘗觸楊駿幾爲身禍况於殿下而當有惜往從駕殿下見語卿不識韓非逆鱗之言耶而歛摩天子逆鱗自知所陳誠額額觸猛虎之鬚耳所以敢言庶殿下當識其不勝區區前摩天子逆鱗欲以盡忠今觸猛獸之鬚非欲爲惡必將以此見恕

答楊濟書

衛公云酒色之殺人此甚於作直坐酒色死人不爲悔逆畏以直致禍此由心不直正欲以苟且爲明哲耳自古以直致禍者當自矯枉過直或不忠允欲以亢厲爲聲故致忿耳安有慳慳爲忠益而當見疾乎

又答楊濟書

違距上命稽停招罰退思此罪在於不測纔加貶黜退用戰慄何復以杖重爲劇小人不德所

好惟酒。宜於養瘡。可數致也。

答李斌書

吾作左丞。未幾而已。吾爲京兆。雖心知此爲不合。然是家鄉親里。自願便從俗耳。時足下問吾當去不。吾答鸚鵡子言。阿安樂。今到阿安樂。何爲不去。

尺牘

答曹志

英氣泉涌。逸藻波騰。

頌

皇太子釋奠頌

蒸蒸皇儲、旣睿且聰、神而明之、夫豈發蒙、謙以
制禮、靡事不恭、企茲良晨、卜近于中、乃脩嘉薦、
于國之雍、敬享先師、以疇聖功、亶亶皇儲、希心
闕里、光光輿服、穆穆容止、祗奉聖靈、躬承明祀、
濟濟儒生、侑侑胄子、清酒于觴、匪宴斯喜、欣道
之弘、自今以始、

傅中丞集

卷全

箴

御史中丞箴

百官之箴以箴王闕余承先君之蹤竊位憲臺
懼有忝累垂翼之責且造斯箴以自勗勵不云
自箴而云御史中丞箴者凡爲御史中丞欲通
以箴之也

煌煌天文衆星是環爰立執法其暉有煥執憲
之綱秉國之憲鷹揚虎視肅清違慢蹇蹇匪躬
是曰王臣旣直其道爰顧其身身之不顧孰有

弗震邦國若否山甫是明焉用彼相莫扶其傾
淮南構逆實憚汲生赫赫有國可無忠貞憂責
有在繩亦必直良農耘穢勿使能植無禮是逐
安惜翹翼嗟爾庶寮各敬乃職無爲罰先無怙
厥力怨及朋友無慙于色得罪天子內省有惡
是用作箴惟以自敕

銘

犀鈎銘有序

世稱駭雞之犀、聞之父常侍曰、犀之美者、有光、
雞見影而驚、故曰駭雞、有以此鈎見遺者、乃爲
之銘、

獸曰玄犀、處自林麓、食惟棘刺、林兼五肉、或
有神、表露以角、含精吐英、望如華燭、置之荒野、
禽獸莫觸、

杖銘

嘉茲奇竹、質勁體直、立比高節、示世矜式、

燭銘

煌煌丹燭、焰焰飛光、取則景龍、擬象扶桑、照彼
玄夜、炳若朝陽、焚形監世、無隱不彰、

扇銘

武都太守房仲發遺扇、無以報爲、銘以識之、云
行藏惟時、孔顏齊軌、

碑銘

中郎將曹府君碑銘

伊公立朝雅然正色既侍皇帷讜言常則

誄

襄邑侯誄

言研其幾文艷春蘭

言振井義文美平南

雲山外制

曾公之防難然王公國計是神廟之常規
中興報尊以尊神

詩

孝經詩 二章

立身行道、始於事親、上下無怨、不惡於人、

一作不敢

惡人孝、無終始、不離其身、三者備矣、以臨其民、

以孝事君、不離令名、進思盡忠、義則不爭、匡救

其惡、災害不生、孝悌之至、通於神明、

論語詩 二章

守死善道、磨而不磷、直哉史魚、可謂大臣、見危授命、能致其身、

詩

克已復禮、學優則仕、富貴在天、爲仁由已、以道
事君、死而後已

毛詩詩二章

無將大車、維塵冥冥、濟濟多士、文王以甯、顯允
君子、大猷是經、

聿脩厥德、令終有俟、勉爾遐思、我言維服、盜言
孔甘、其何能淑、讒人罔極、有覲面目、

周易詩

卑以自牧、謙尊而光、進德脩業、既有典常、暉光

日新、照于四方、小人勿用、君子道長

周官詩 二章

惟王建國

一作極

設官分職、進賢興功、取諸

初學作時

文

易直除其不蠲、無敢反側、以德詔爵、允臻其

極

辨其可任、以告于正、掌其戒禁、治其政令、各脩

乃職、以聽王命

左傳詩

事君之禮、敢不盡情、敬奉德義、樹之風聲、昭德

塞違不殞其名。死而利國。以爲已榮。茲心不爽。
忠而能力。不爲利啗。古之遺直。威黜不端。勿使
能植。

與尚書同僚詩

非望之寵。謬加于已。猥授非據。奄司萬里。煌煌
朱軒。服驥驂騑。曄曄初星。肅肅臣僕。暉光顯赫。
衆目所屬。斯之弗稱。匪榮伊辱。質弱尚父。受任
鷹揚。德非樊仲。王命是將。百城或違。無能有匡。
一州之矜。將弛其綱。得意忘言。言在意後。夫惟

神交可以長久。我心之孚。有盈于缶。與子偕老。
豈曰執手。出司萬一作百里。牧彼朔濱。服冕乘軒。
六轡既均。威風先邁。百城肅震。

贈褚武良詩

爰暨于褚。惟晉之禎。肇振鳳翼。羽儀上京。聿作
喉舌。納言紫庭。光贊帝道。敷皇之明。方任之重。
實在江揚。乃授旄鉞。宣曜威靈。悠悠遐邁。東夏
于征。

贈崔伏二郎詩

英妙之選、二生之授、駟駟兩城、歡德之茂、君子
所居、九夷非陋、無狹百里而不垂覆、人之好我、
贈我清詩、示我周行、心與道期、誠發自中、義形
於辭、古人辭讜、豈不爾思、

荅潘尼詩

并序

司州秀才潘正叔、識通才高、以文學溫雅爲
博士、余性直而處清論、褒貶之任、作詩以見
規、雖褒飾之舉、非所敢聞、而斐燦之辭、良可
樂也、荅之雖不足以相訓報、所謂盍各言志

也

貽我妙文、繁春之榮、匪榮期尚、乃新其聲、吉甫作頌、有馥其馨、實由樊仲、其德克明、授此瓦礫、厠彼瑤瓊、貺非其喻、聞寵若驚

荅樂弘詩

并序

安樂令樂弘、太傅鉅平侯羊公、辟未就而公薨、後應司州之命、舉秀才、博文通濟之士、余失和於府、當換爲護軍司馬、賦詩見贈、荅之云爾

鉅平作宰，是貴是欽。弓旌仍招，嘉命胥尋。鸞鳳
養儀，戢翼幽林。未附雅調，以和韶音。鉅平遐逝，
厲志彌深。肅肅京司，清風裁邁。乃延群彥，龍集
鳳會。亦旣斯降，萬里有賴。聲發響應，好結傾蓋。

贈建平太守李叔龍

弘道興化，實在良守。悠悠建平，皇澤未流。朝選
於衆，乃子之授。南荆注望，心乎克副。

贈何劭王濟

并序

朗陵公何敬祖，咸之從內兄。國子祭酒王武

子咸從姑之外孫也。竝以明德見重於世。咸親之重之。情猶同生。義則師友。何公旣登侍中。武子俄而亦作。二賢相得甚歡。咸亦慶之。然自恨闇劣。雖願其繾綣而從之。末由。厯試無效。且有家艱。心存目替。賦詩申懷。以貽之云爾。

日月光太清。列宿曜紫微。赫赫大晉朝。明明闕
皇闈。吾兄旣鳳翔。王子亦龍飛。雙鸞遊蘭渚。二
離揚清暉。攜手升玉階。並坐侍丹帷。金璫綴惠

文煌煌發令姿、斯榮非攸庶、繾綣情所希、豈不
企高蹤、麟趾邈難追、臨川靡芳餌、何爲守空坻、
槁葉待風飄、逝將與君違、違君能無戀、尸素當
言歸、歸身蓬華廬、樂道以忘饑、進則無云補、退
則恤其私、但願隆弘美、王度日清夷、

贈太尉司馬虞顯機

帝崇元淑、妙選其屬、命子是佐、增袞之縟、

失題

奕奕恒山、作鎮冀方、伊趙建國、在岳之陽、

失題

見初學
露部

零露濔江海飛塵崇山岳過謬佐台輔安能任
鼎餽

傳中子集

卷全

三

本傳

傅咸字長虞，剛簡有大節，風格峻整，識性明悟，疾惡如仇，推賢樂善，常慕季文子仲山甫之志。好屬文論，雖綺麗不足而言成規鑒。潁川庾純常歎曰：「長虞之文，近乎詩人之作矣。」咸甯初，襲父爵拜太子洗馬，累遷尚書右丞，出爲冀州刺史。繼母杜氏不肯隨咸之官，自表解職三旬之間，遷司徒左長史。時帝留心政事，詔訪朝臣政之損益，咸上言：「請重農務，在位多所執正。」豫州

大中正夏侯俊上言魯國小中正司空司馬孔
毓四移病所不能接賓求以尚書郎曹馥代毓
旬日復上毓爲中正司徒三却俊故據正咸以
俊與奪惟意乃奏免俊大中正司徒魏舒俊之
姻屬屢却不署咸據正甚苦舒終不從咸遂獨
上舒奏咸激訕不直詔轉咸爲車騎司馬咸以
世俗奢侈上書匡救又議移縣獄於郡及二社
應立朝廷從之遷尚書左丞惠帝卽位楊駿輔
政咸言於駿謂山陵旣畢當思隆替之宜司隸

荀愷從兄喪自表赴哀詔聽之而未下愷乃造駿咸奏愷宜加顯貶帝以駿管朝政有詔不問駿甚憚之咸復與駿箋諷切之駿意稍折漸以不平由是欲出爲京兆弘農太守駿甥李斌說駿不宜斥出正人乃止駿弟濟素與咸善與咸書咸據理以荅居無何駿誅咸轉爲太子中庶子遷御史中丞時太宰汝南王亮輔政咸致書規之亮不納會景寅詔群僚舉郡縣之職以補內官咸復上書請無拘限法再爲本郡中正遭

繼母憂去官。頃之起，以議郎長兼司隸校尉。咸前後固辭，不聽。勅使者就拜。咸復送還印綬，公車不通，催使攝職。咸以身無兄弟喪祭無主，重自陳乞，乃使於官舍設靈坐。咸又上表請伸威嚴。以劉毅自倣。詔曰：「但當思必應繩中理，咸風自伸。」何獨劉毅時朝廷寬弛，豪右放恣，交私請託，朝野溷淆。咸奏免河南尹澹、左將軍倩、廷尉高光兼河南尹何攀等。京都肅然。貴戚懾伏。咸以聖人久於其道，天下化成，是以唐虞三載考

績九年黜陟。其在周禮三年大比。孔子亦云三年有成。而中間以來。長吏到官。未幾便遷。百姓困於無定。吏卒疲於送迎。時僕射王戎兼吏部。咸奏戎備位台輔。兼掌選舉。不能謐靜風俗。以凝庶績。至今人心傾動。開張浮競。中郎李重李義不相匡正。請免戎等官。詔曰。政道之本。誠宜久於其職。咸奏是也。戎職在論道。吾所崇委。其解禁止。御史中丞解結。以咸劾戎爲違典制。越局侵官。干非其分。奏免咸官。詔亦不許。咸累自

上稱引故事條理灼然朝廷無以易之吳郡顧
榮常與親故書曰傳長虞爲司隸勁直忠果劾
案驚人雖非周才偏亮可貴也元康四年卒官
時年五十六詔贈司隸校尉朝服一具衣一襲
錢二十萬謚曰貞有三子敷晞纂長子敷嗣
史臣曰長虞風格凝峻弗墜家聲及其納諫汝
南獻書臨晉居諒直之地有先見之明矣

新大義

新大義

卷一

二

潘太常集

潘太常集題辭

史稱潘正叔著論究人道之綱裁箴
懸乘輿之鑒此二文者非徒龍甲鳳
毛亦其生平所以自立也元康薦亂
八王鬪爭從父安仁一門罹酷正叔
知幾歸掃墳墓後得封公顯職壽終

塢壁當安仁初任河陽贈詩祖道美
其天姿刑僂之後樹碑紀事增慟覆
醢其於叔父情篤猶中郎也存沒異
路榮辱天壤逃死須臾之間垂聲三
王之際至今誦閒居者笑黃門之乾
沒讀安身者重太常之居正人物短

長亦懸禍福泉下嘿嘿烏誰雌雄卽
有不平能更收召魂魄抗眉爭列哉
傅長虞會定九品正叔作詩規之其
爲人也無詭隨其爲文也無戲謔大
致類然若琴有八分之書賦著琉璃
之盃適文人餘韻也

婁東張溥題

潘太常集目錄

賦

東武館賦

有序

西道賦

又

懷退賦

武庫賦

釣賦

火賦

苦雨賦

琉璃椀賦

瑇瑁椀賦

扇賦

石榴賦

桑樹賦

芙蓉賦

鼈賦

有引

朝菌賦序

頌

釋奠頌

有序

後園頌

箴

乘輿箴

有序

論

安身論

序

送二李郎詩序

銘

戴侍中銘

碑

益州刺史楊恭侯碑

給事黃門侍郎潘君碑

詩

七月七日侍皇太子宴玄圃

贈陸機出爲吳王郎中令

六章

答陸士衡

答傅咸詩 并序

皇太子集應令

皇太子社

三月三日洛水作

贈河陽詩

贈侍御史王元貺

贈長安令劉正伯

贈隴西太守張正治

贈滎陽太守吳子仲

答楊士安

送盧景宣

迎大駕

逸民吟

釋奠詩

送大將軍掾盧晏

贈汲郡太守李茂彥

贈劉佐

附錄

本傳

潘太常集目錄終

潘太常集

目錄

四

滑才常集

目錄

四

卷之四

卷之四

潘太常集卷全

晉滎陽潘尼正叔著

明 太倉張 溥閱

賦

東武館賦 有序

東武館者，蓋東武陽侯之館也。俄而遷居，謂余曰：吾將老焉，故有終焉之心，而無移易之志。子且爲我賦之。

嘉大雅之洪操，美明哲之保身。懲都邑之迫險，

厭里巷之囂塵。慕古公之胥宇。羨孟氏之審隣。
將遷居于爽塏。乃投迹於里仁。前則行旅四溟。
通衢交會。水泛輕舟。陸方羽蓋。後則崇山崔嵬。
茂林幽藹。彌望遠覽。滉漾夷泰。表裏山河。出入
襟帶。若乃潛流旁注。飛渠脉散。芙蓉映渚。靈芝
蔽岸。於是逍遙靈沼。遊豫華林。彎弓撫彈。娛志
蕩心。枯不空縱。綸不苟沈。遊鱗雙躍。落羽相尋。
膳夫進俎。虞人獻鮮。春醴九醞。嘉豆百籩。隨波
沂流。乍往乍旋。

西道賦

異山河之岨阨、倦關谷之盤紆、車低徊於潛軌、馬佗倅於險塗、狗肘還勾、羊角互戾、菟窟連投、十數億計、石子之澗、坎陷之穴、支體爲之危竦、形骸爲之疲曳、此亦行者之艱難、羈旅之困敝、若其名坂、則羊羔美人、成阜黃馬、迴波激浪、飛沙飄瓦、馬則頓躓狼傍、虺頽立黃、牛則體疲力竭、損食喪膚、履蹄穿領、摩髓脫軀、

又

潘方集 卷三 二
道深地狹坂峭軌長輪輿顛覆人馬仆僵

懷退賦

伊疇昔之懷憤思天飛以遠迹望循塗而投軌
溯翔風以理翮冀雲霧之可憑希天路之開闢
何時願之多違奄就羈以服役困吳坂之峻岨
畏鹽車之嚴筴嗟遊處之弗遇奚鬱悵之難任
背宇宙之寥廓羅網罟之重深常屏氣以斂迹
焉遊豫以娛心傳釋板以亮殷望投竿而相姬
窮獨善以全質達兼利以濟時聃安志於柱史

由抗迹於嵩箕理殊塗而同歸雖百慮其何思
敢因虛以託談遂逡巡而造辭

武庫賦

若夫大刀寶劒曠世絕殊煉質於昆吾之竈定
形於薛燭之鑪

釣賦

抗余志於浮雲樂余身於蓬廬尋渭濱之遠跡
且游釣以自娛左援脩竹右縱飛綸金鉤厲鉅
甘餌垂芬衆鯢奔涌游鱗橫集觸餌見擒值鉤

被執長繳續紛輕竿翕熠雲往颺馳光飛電八
曜靈未及警策蓋已獲其數十且夫燔炙之鮮
煎熬之味百品千變殊芳異氣隨心適好不可
勝紀乃命宰夫膾此潛鯉名工習巧飛刀逞伎
電剖星流芒散縷解隨風離鍰連翩雪累西戎
之蒜南夷之薑醢酸調適齊和有方紅麵之飯
糲以菰梁五味道洽餘氣芬芳和神安體易思
難忘

火賦

覽天人之至周、嘉火德之爲貴、含太陽之靈暉、
體淳剛之正氣、先聖仰觀、通神悟靈、窮物盡數、
研幾至精、形生於未兆、聲發於無象、盡之不得、
其根聽之不聞、其響求則莫見、其跡去則不知、
其往似大道之未離、而元氣之灝瀟、故能博瞻、
羣生資育、萬類盛而不暴、施而不費、其變無方、
其用不匱、鑽燧造火、陶冶羣形、協和五味、革變、
羶腥、酒醴烹飪于斯、獲成爾乃、狄牙典膳、百品、
旣陳、和羹苴醪、旨酒醲醕、烹黿煮鼉、灼龜臠鱗、

若乃流金化石鑠鐵融銅造制戎器以戒不恭
砥鍊兵械整飾軍容四海康乂邊境無寇韜弓
戢劍解甲釋胄銷鎬爲耒鑄戈爲耨戰士反於
耕農戎馬放乎外廐及至焚野燎原一火赫曦
林木摧拉沙粒並糜騰光絕覽雲散電披遂及
衝風激揚炎光奔逸玄煙四合雲蒸霧萃山陵
爲之崩弛川澤爲之涌沸去若風驅疾如電逝
芬綸紆轉倏忽橫厲蕭條長空野無孑遺無隰
不灰無堦不斃震響達乎八冥流光燭乎四裔

榛蕪旣除、九野謐清、蕩枝瘁於凜秋、候來春而
改生、其揚聲發怒、則雷電之威也、明照遠鑒、則
日月之暉也、甄陶品物、則造化之制也、濟育羣
生、則天地之惠也、是以上聖人擬火以制禮、鄭
僑據猛以立政、功用關乎古今、勲績著乎百姓、

苦雨賦

氣觸石而結蒸、今雲膚合而仰浮、雨紛射而下
注、今潦波湧而橫流、豈信宿之云多、乃踰月而
成霖、瞻中塘之浩汗、聽長雷之泅泅、始濛濛而

徐墜終滂沛而難禁悲列宿之匿景悼太陽之
幽沈雲暫披而驟合雨乍息而亟零旦澁澁以
達暮夜淋淋以極明鼃鼃遊於門闥蛙蝦嬉乎
中庭懼二源之并合畏黔首之爲魚處者含瘁
於窮巷行者歎息於長衢

琉璃椀賦

覽方貢之彼珍瑋茲椀之獨奇濟流沙之絕險
越葱嶺之峻危其由來也阻遠其所託也幽深
據重巒之億仞臨洪溪之萬尋接玉樹以瓊瑤

鄰沙棠與碧林、瞻閭風之崔嵬、顧玄圃之蕭參、
於是遊西極、望大蒙、厯鍾山、闕燭龍、覲王母、訪
仙童、取琉璃之攸華、詔曠世之良工、纂玄儀以
取象、准三辰以定容、光映日曜、圓盛月盈、纖瑕
罔麗、飛塵靡停、灼爍旁燭、表裏相形、凝霜不足
方其潔、澄水不能喻其清、剛過金石、勁勵瓊玉、
磨之不磷、涅之不濁、舉茲椀以酬賓、榮密坐之
曲宴、流景炯晃以內澈、清醴瑤琰而外見、

瑋瑁椀賦

有瑇瑁之奇寶、亦同旅于介蟲、下法川以矩夷、
上擬乾而規隆、或步趾於清源、或掉尾於泥中、
隨陰陽以潛躍、與龜龍乎齊風、包神藏智、備體
兼才、高下斯處、水陸皆能、文若綺波、背負蓬萊、
爾乃遐夷效珍、越裳貢職、橫海萬里、踰嶺千億、
挺璞荒蠻、摘藻辰極、光曜炫晃、昭爛煥赭、嘉斯
寶之兼美、料衆珍而靡對、文不煩於錯縷、采不
假乎藻績、豈翡翠之足儷、胡犀象之能逮、

扇賦

夫器有經粗用有疎密安衆以方爲體五明以
圓爲質或託形於竹素或取固於膠漆方圓應
於規矩制度由於繩墨始顯用於荒蠻終表奇
于上國、

石榴賦

安石榴者天下之奇樹九州之名果是以屬文
之士或敘而賦之蓋感時而騁思覩物而興辭
余遷舊宇爰造新居前臨曠澤却背清渠實有
斯樹植于堂隅華實並麗滋味亦殊可以樂志

可以克虛朱芳赫奕紅萼參差含英吐秀乍含
乍披遙而望之煥若隋珠耀重川詳而察之灼
若列宿出雲間湘涯二后漢川遊女攜類命疇
逍遙避暑託斯樹以栖遲遡祥風而容與爾乃
擢纖手兮舒皓腕羅袖靡兮流芳散披綠葉於
脩條綴朱華兮弱幹豈金翠之足珍實茲葩之
可翫商秋授氣收華歛實千房同蒂十子如一
繽紛磊落垂光耀質滋味浸液馨香流溢

桑樹賦

從明儲以省膳憇便房以偃息觀茲樹之特偉
感先皇之攸植蔚蕭森以四射邈洪傭而端直
爾乃徘徊周覽俯仰逍遙俛睨靈根上眺脩條
洞芳泉於九壤含溢露於清霄倚增城之飛觀
拂綺窗之䟽寮下迢遞以極望上扶踈而參差
匪衆鳥之攸萃相皇鸞之羽儀理有微而至顯
道有隱而應期豈皇晉之貞瑞兆先見而啓茲
起尋抱於纖毫崇萬簣於始基

芙蓉賦

或擢莖以高立似彫輦之翠蓋或委波而布體
擬連璧之攢會

鼈賦

有序

皇太子遊於立圃遂命釣魚有得鼈而獻之者
令侍臣賦之

翩銜鈎以振掉吁駭人而可惡旣顛墜於巖岸
方盤跚而雅步或延首以鶴顧或頓足而鷹距
或曳尾於塗中或縮頭於殼裏若乃秋水暴駭
百川沸流有東海之巨鼈乃負山而吞舟

朝菌賦序

朝菌者蓋朝華而暮落世謂之木槿或謂之日
及詩人以爲舜華宜尼以爲朝菌其物向晨而
結建明而布見陽而盛終日而殞不以其異乎
何名之多也

卷之三

目錄

六

頌

釋奠頌 有序

元康元年冬十二月，上以皇太子富於春秋，而人道之始，莫先於孝悌，初命講孝經於崇政殿，實應天縱生知之量，微言與義，發自聖問，業終而體達，至三年春閏月，將有事於上庠，釋奠于先師，禮也。越二十四日，丙申，侍祠者既齊，輿駕次于太學，太傅在前，少傅在後，恂恂乎弘保訓之道，宮臣畢從，三率備衛，濟濟乎肅翼贊之敬。

乃掃壇爲殿，懸幕爲宮。夫子位于西序，顏回侍于北墉。宗伯掌禮，司儀辨位。二學儒官，搢紳先生之徒，垂纓佩玉，規行矩步者，皆端委而陪於堂下，以待執事之命。設樽篚於兩楹之間。陳罍洗於阼階之左。几筵旣布，鐘懸旣列，我后乃躬拜俯之勤，資在三之義，謙光之美，彌劭闕里之教。克崇穆穆焉邕邕焉，真先王之徽典，不刊之美業，允不可替已。於是牲饋之事旣終，享獻之禮已畢，釋玄衣，御春服，弛齋禁，反故式。天子乃

命內外羣司、百辟卿士、蕃王三事、至于學徒國
子、咸來觀禮、我后皆延而與之、燕金石簫管之
音、八佾六代之舞、鏗鏘闐闐、般辟俛仰、可以激
神滌欲、移風易俗者、罔不畢奏、抑淫哇、屏鄭衛、
遠佞邪、釋巧辯、是日也、人無愚智、路無遠邇、離
鄉越國、扶老携幼、不期而俱萃、皆延頸以視、傾
耳以聽、希道慕業、洗心革志、想洙泗之風、歌來
蘇之惠、然後知居室之善、著應乎千里之外、不
言之化、洋溢于九有之內、於熙乎若典、固皇代

之壯觀、萬載之一會也、尼昔忝禮官、嘗聞俎豆、
今廁末列、親覩盛美、馘漬徽猷、沐浴芳潤、不知
手舞口詠、竊作頌一篇、義近辭陋、不足測盛德
之形容、光聖明之遐度、其辭曰

二元迭運、五德代徽、黃精既亢、素靈乃暉、有皇
承天、造我晉畿、祚以大寶、登以龍飛、宣基誕命、
景熙遐緒、三分自文、受終惟武、席卷要蠻、蕩定
荒阻、道濟羣生、化流率土、後帝承式、丕隆曾構、
奄有萬方、光宅宇宙、篤生上嗣、繼期挺秀、聖敬

日躋濬哲閔茂留精儒術敦閱古訓遵道讓齒
降心下問鋪以金聲光以玉潤如日之升如乾
之運乃延台保乃命學臣聖容穆穆侍講閭闔
抽演微言啓發道真探幽窮蹟溫故知新講業
旣終精義旣研崇聖重師十日告奠陳其三牢
引其四縣旣戒旣式乃盥乃薦恂恂孔聖百王
攸希亶亶顏生好學無違曰皇儲后體神合機
兆吉先見知來洞微濟濟二宮藹藹庶寮俊乂
鱗萃髦士盈朝如彼和肆莫匪瓊瑤如彼儀鳳

樂我雲韶。瓊瑤誰剖。四門洞開。雲韶奚樂。神人
允諧。蟬冕耀庭。細珮振階。德以謙光。仁以恩懷。
我酒惟清。我肴惟馨。舞以六代。歌以九成。萃萃
胄子。祁祁學生。洗心自百。觀國之榮。學猶蒔苗。
化若偃草。博我以文。弘我以道。萬邦蟬蛻。矧乃
俊造。鑽蚌瑩珠。剖石摘藻。絲匪玄黃。水罔方圓。
引之斯流。染之斯鮮。若金受範。若埴在甄。上好
如雲。下效如川。昔在周興。王化之始。曰文曰武。
時惟世子。今我皇儲。濟聖通理。緝熙重光。於穆

不已於穆伊何思文哲后媚茲一人實副元首
孝洽家邦光照九有純嘏自晉永世昌阜微微
下臣過克近侍猥躡風雲鸞龍是厠身澡芳流
目玩盛事竭誠作頌祇詠聖志

後園頌

芒芒在昔悠悠結繩太僕未散玄化霑凝羲皇
繼踵三代相承五德更王文質迭興天命匪謐
祐謙輔信乃眷我皇光有大晉應期納祚天人
是順和氣四克惠澤旁潤神祇告祥四靈效質

游龍升雲、儀鳳翳日、甘露晨流、醴泉涌溢、華夏
旣甯、八荒靜謐、人亦有言、我何以休、乃延卿士
從皇以遊、長筵遠布、廣幕四周、嘉肴惟芳、旨酒
思柔、巖巖峻岳、湯湯玄流、翔鳥鼓翼、游魚載浮、
明明天子、肅肅庶官、文士濟濟、武夫桓桓、講藝
華林、肄射後園、威儀旣具、弓矢斯閑、恂恂謙德、
穆穆聖顏、賜以晏飲、詔以話言、黍稷旣登、貨財
旣豐、仁風潛運、皇化彌隆、征夫釋甲、戰士罷戎、
遐夷慕義、絕域望風、無或慢易、在始慮終、無或

安逸在盈思冲。

潘氏常集

卷全

頌

古

卷之四

卷之四

四

箴

乘輿箴

有序

易稱有天地然後有人倫有父子然後有君臣傳曰大者天地其次君臣然君臣父子之道天地人倫之本未有以先之者也故天生蒸民而樹之君使司牧之將以導羣生之性而理萬物之情豈以寵一人之身極無量之欲如斯而已哉夫古之爲君者無欲而至公故有茅茨土階之儉而後之爲君有欲而自利故有瑤臺瓊室

之後無欲者天下共推之有欲者天下共爭之
推之之極雖禪代猶脫屣爭之之極雖劫殺而
不避故曰天下非一人之天下乃天下之天下
安可求而得辭而已者乎夫脩諸已而化諸人
出乎邇而見乎遠者言行之謂也故人主所患
莫甚於不知其過而所美莫美於好聞其過若
有君於此而曰予必無過唯其言而莫之違斯
孔子所謂其庶幾乎一言而喪國者也蓋君子
之過如日月之蝕過也人皆見之更也人皆仰

之雖以堯舜湯武之盛必有誹謗之木敢諫之
鼓盤杆之銘無諱之史所以閑其邪僻而納諸
正道其自維持如此之備故箴規之興將以救
過補闕然猶依違諷喻使言之者無罪聞之者
足以自誠先儒旣援古義舉內外之殊而高祖
亦序六官論成敗之要義正辭約又盡善矣自
虞人箴以至于百官非唯規其所司誠欲人主
斟酌其得失焉春秋傳曰命百官箴王闕則亦
天子之事也尼以爲王者膺受命之期當神器

之運、總萬機而撫四海、簡羣才而審所授、孜孜
於得人、汲汲於聞過、雖廷爭面折、猶將祈請而
求焉、至於箴規諫之順者、曷爲獨闕之哉。是以
不量其學陋、思淺、因負擔之餘、嘗試撰而述之、
不敢斥至尊之號、故以乘輿目篇、蓋帝王之事
至大、而古今之變至衆、文繁而義詭、意局而辭
野、將欲希企前賢、髣髴崇軌、譬猶邱垤之望華
岱、恒星之繫日月也、其不逮明矣、頌曰

元元遂初、芒芒太始、清濁同流、玄黃錯峙、上下

弗形尊卑靡紀赫胥悠哉大庭尚矣皇極啓建
兩儀既分彝倫永序萬邦已紛國事明王家奉
嚴君各有攸尊德用不勤義農已降暨于夏殷
或禪或傳乃質乃文太上無名下知有之仁義
不存而人歸孝慈無爲無執何欲何思忠信之
薄禮刑實滋既譽既畏以侮以欺作誓作盟而
人始叛疑煌煌四海藹藹萬乘匪誓焉憑左輔
右弼前疑後丞一日萬機業業競競夫出其言
善則千里是應而莫余違亦喪邦有徵樞機之

動式以廢興殷監不遠若之何勿徵且厚味腊
毒豐屋生災辛作璇室而夏興瑤臺糟邱酒池
象筩玉杯厥肴伊何龍肝豹胎惟此哲婦職爲
亂階殷用喪師夏亦不恢是以帝堯在位茅茨
不翦周文日昃昧旦丕顯夫德輶如毛而或舉
之者鮮故湯有慙德武未盡善下世道衰末俗
化淺耽樂逸遊荒淫沈湎不式古訓而好是佞
辯不遵王路而覆車是踐成敗之効載在先典
匪唯陵夷厥世用殄故曰樹君如之何將人是

司牧視之猶傷而知其寒燠故能撫之斯柔而
敦之斯睦無遠不懷靡思不服夫豈厭縱一人
而玩其耳目內迷聲色外荒馳逐不脩政事而
終於顛覆昔唐氏授舜舜亦命禹受終納祖丕
承天序放桀惟湯尅殷伊武故禪代非一姓社
稷無常主四嶽三塗九州之阻彭蠡洞庭殷商
之旅虞夏之隆非由尺土而紂之百尅卒於絕
緒故王者無親唯在擇人傾蓋惟舊白首乃新
望由鈞夫伊起有莘負鼎鼓刀而謀合聖神

夫豈借官左右而取介近臣蓋有國有家者莫
云我聰或此面從莫謂我智聽受未易甘言美
疾尠不爲累由夷逃寵遠於脫屣奈何人王位
極則侈知人則哲惟帝所難唐朝旣泰四族作
妖周室旣隆而管蔡不虔匪我二聖孰弭斯患
若九德咸受儁乂在官君非臣莫治臣非君莫
安故書美康哉而易貴金蘭有皇司國敢告納
言

論

安身論

蓋崇德莫大乎安身、安身莫尚乎存正、存正莫重乎無私、無私莫深乎寡欲、是以君子安其身而後動、易其心而後語、定其交而後求、篤其志而後行、然則動者吉凶之端也、語者榮辱之主也、求者利病之幾也、行者安危之決也、故君子不妄動也、動必適其道、不徒語也、語必經於理、不苟求也、求必造於義、不虛行也、行必由於正、

夫然用能免或繫之凶、享自天之祐、故身不安則殆、言不從則悖、交不審則惑、行不篤則危、四者行乎中、則患憂接於外矣、憂患之接必生於自私而興於有欲、自私者不能成其私、有欲者不能濟其欲、理之至也、欲苟不濟、能無爭乎、私苟不從、能無伐乎、人人自私、家家有欲、衆欲並爭、羣私交伐、爭則亂之萌也、伐則怨之府也、怨亂既構、危害及之、得不懼乎、然棄本要末之徒、知進忘退之士、莫不飾才銳智、抽鋒擢穎、傾側

乎勢利之交、馳騁乎當塗之務、朝有彈冠之朋、
野有結綬之友、黨與熾於前、榮名扇其後、握權
則赴者鱗集、失寵則散者瓦解、求利則託芻豢、
之、懽爭路則構刻骨之隙、於是浮僞波騰、曲辯
雲沸、寒暑殊聲、朝夕異價、駑蹇希奔放之跡、鉛
刀競一割之用、至於愛惡相攻、與奪交戰、誹謗
噂噍、毀譽縱橫、君子務能、小人伐技、風頽於上、
俗弊於下、禍結而恨爭之不彊、患至而悔伐之
未辨、大者傾國喪家、次則覆身滅祀、其何故邪、

豈不始於私欲而終於爭伐哉。君子則不然。知
自私之害公也。故後外其身。知有欲之傷德也。
故遠絕榮利。知爭競之遘災也。故犯而不校。知
好伐之招怨也。故有功而不德。安身而不爲私。
故身正而私全。慎言而不適欲。故言濟而欲從。
定交而不求益。故交立而益厚。謹行而不求名。
故行成而名美。止則立乎無私之域。行則由乎
不爭之塗。必將通天下之理。而濟萬物之性。天
下猶我故。與天下同其欲已。猶萬物故。與萬物

同其利夫能保其安者非謂崇生生之厚而耽
逸豫之樂也不忘危而已有期進者非謂窮貴
寵之榮而藉名位之重也不忘退而已存其治
者非謂嚴刑政之威而明司察之禁也不忘亂
而已故寢蓬室隱陋巷披短褐茹藜藿環堵而
居易衣而出苟存乎道非不安也雖坐華殿載
文軒服黼黻御方丈重門而處成列而行不得
與之齊榮用天時分地利甘布衣安藪澤沾體
塗足耕而後食苟崇乎德非不進也雖居高位

譽重祿執權衡握機秘功蓋當時勢侔人主不得與之比逸遺意慮沒才智忘肝膽棄形器貌若無能志若不及苟正乎心非不治也雖繁計策廣術藝審刑名峻法制文辨流離議論絕世不得與之爭功故安也者安乎道者也進也者進乎德者也治也者治乎心者也未有安身而不能保國家進德而不能處富貴治心而不能治萬物者也然思危所以求安慮退所以能進懼亂所以保治戒亡所以獲存也若乃弱志虛

心曠神遠致徙倚乎不拔之根浮遊乎無垠之
外不自貴於物而物宗焉不自重於人而人敬
焉可親而不可慢也可尊而不可遠也親之如
不足天下莫之能狎也舉之如易勝而當世莫
之能困也達則濟其道而不榮也窮則善其身
而不悶也用則立於上而非爭也舍則藏於下
而非讓也夫榮之所不能動者則辱之所不能
加也利之所不能勸者則害之所不能嬰也譽
之所不能益者則毀之所不能損也今之學者

誠能釋自私之心，塞有欲之求，杜交爭之原，去
矜伐之態，動則行乎至通之路，靜則入乎大順
之門，泰則翔乎寥廓之宇，否則淪乎渾冥之淵，
邪氣不能干其度，外物不能擾其神，哀樂不能
盪其守，死生不能易其真，而以造化爲工匠，天
地爲陶鈞，名位爲糟粕，勢利爲埃塵，治其內而
不飾其外，求諸已而不假諸人，忠肅以奉上，愛
敬以事親，可以御一體，可以牧萬民，可以處富
貴，可以居賤貧，經盛衰而不改，則庶幾乎能安身矣

序

贈二李郎詩序

元康六年尚書吏部郎汝南李光彥遷汲郡太守都亭侯江夏李茂曾遷平陽太守此二子皆弱冠知名歷職顯要旬月之間繼踵名郡離儉劇之勤就放曠之逸枕鳴琴以俟遠致離別之際各斐然賦詩

銘

戴侍中銘

雅論弘博逸藻波騰

劉克莊集

臨幸世宗時文廟之盛如夢如幻矣

傳錄歌聲臥柳船
西風吹雨上江船
綠柳依依水自流
綠柳依依水自流

平陽縣志

碑

益州刺史楊恭侯碑

君乾靈之醇德，挺一世之殊量。稟天然不渝之操，體蘭石芳堅之質。夫其器膺弘濟，知能周達，窮不怨否，顯不矜泰。履行則爲模楷，吐言則成隲括。德實克於內，而光華發乎外也。君發迹州國，委質明主。自景皇帝攝政，文皇帝繼業，值天下多虞，疆場未靜。以君先帝所拔，懷寶後時，而深達遠識，有經國之量。故爲腹心謀臣，而監度

政事焉君出則簡練熊羆職司是圖入則從容
諷議盡規帷幄其所以進可替否決疑定策者
皆言効於既往而事簡於帝心君再臨司官三
撫名郡方將宣文德以來遠建武功於所牧銘
曰

天生蒸民有類有則誕育恭表應期秀特文兼
六行武備七德忠肅弘毅柔嘉溫克機事無瑕
臨疑不惑我謀既精我化既清澤流河朔勲著
王庭西南未夷侯其是甯上天不惠早世潛靈

給事黃門侍郎潘君碑

君遇孫秀之難、闔門受禍、故門生感、覆醢以增、
慟、乃樹碑以紀事、

海大常集

卷全

三

謝氏恭簡公集

謝氏恭簡公集

謝氏恭簡公集

詩

七月七日侍皇太子宴立圃

商風初授辰火微流朱明送夏少昊迎秋嘉禾
茂園芳草被疇於時我后以豫以遊

贈陸機出爲吳王郎中令

六章

東南之美曩惟延州顯允陸生於今尠

五臣儔作鮮儔

振鱗南海濯翼清流婆娑翰林容與墳邱

玉以瑜潤墮以光融乃漸上京羽

善作乃

儀儲宮

玩爾清藻味爾芳風泳之彌廣挹之彌冲

崑山何有，有璫有珉，及爾同僚，具惟近臣。予涉素秋，子登青春，愧無老成，則彼日新。

祁祁大邦，惟桑惟梓，穆穆伊人，南國之紀。帝曰：爾諧，惟王卿士，俯僂從命，奚恤奚喜。

我車旣巾，我馬旣秣，星陳夙駕，載脂載轄。婉孌二宮，徘徊殿闥，醪澄莫饗，孰慰饑渴。

昔子忝私，貽我蕙蘭，今子徂東，何以贈旃。寸晷惟寶，豈無璵璠，彼美陸生，可與晤言。

答陸士衡

顧茲蓬蔚，厠根蘭陂。膏澤雖均，華不足披。逮春
不茂，未秋先萎。子濯鱗翼，我挫羽儀。願言難常
載，合載離昔遊。禁闥祇畏夕惕，今放邱園縱心
夷。易口詠新詩，目玩文跡。予志耕圃，爾勤王役。
慙無琬琰，以訓尺璧。

答傅咸詩

并序

司徒左長史傅長虞會定九品，左長史宜得
其才，屈爲此職，執天下清議，宰割百國，而長
虞性直而行，或有不堪。余與之親，作詩以規

焉。

悠悠群吏。非子不整。嗷嗷衆議。非子不靖。忽荷
畧紐。握綱提領。矯矯貞臣。惟國之屏。

皇太子集應令

聖朝命方岳。爪牙司北鄰。皇儲延篤愛。設餞送
遠賓。誰應今日宴。具惟廊廟臣。置酒宣猷庭。擊
鼓靈沼濱。羽觴飛醽醁。芳饌備奇珍。巴渝二八
奏。妙舞鼓鐸振。長祛一作袂生廻飈。曲裾揚輕塵。

皇太子社

太族協青陽，履端發歲首。孟月涉初旬，吉日唯
上酉。我后邇天休，設社祈遐耆。

三月三日洛水作

晷運無窮已，時逝焉可追。斗酒足爲歡，臨川胡
獨悲。暮春春服成，百草敷英蕤。聊爲三日遊，方
駕結龍旂。廊廟多豪俊，都邑有艷姿。朱軒蔭蘭
皋，翠幙映洛湄。臨崖濯素手，步水褰輕衣。沈鈞
出比目，舉弋落雙飛。羽觴乘波進，素俎隨初學
作逐
流歸。

贈河陽詩

叔潘岳爲河陽令

慮生化單父，子奇蒞東阿。
桐鄉建遺烈，武城播絃歌。
逸驥騰夷路，潛龍躍洪波。
弱冠步鼎鉉，旣立宰三河。
流聲馥秋蘭，摘藻豔春華。
徒美天姿茂，豈謂人爵多。

贈侍御史王元貺

崑山積瓊玉，廣厦構衆材。
游鱗萃靈沼，撫翼希天階。
膏蘭孰爲消，濟治由賢能。
王侯厭崇禮，廻迹清憲臺。
蠖屈固小往，龍翔廼大來。
協心毘聖

世畢力讚康哉

贈長安令劉正伯

遊鸞憑太虛，騰鱗託浮霄。過蒙嘉時會，假翼陵
扶搖。疲憊克時乏，及余再同僚。並跡侍儲宮，携
手登皇朝。劉侯撫西都，邁績參豹喬。德厚化必
深，政明姦自消。萬尋由積簣，千里一步超。爾其
騁逸軌，遠塗固可要。

贈隴西太守張正治

二八由唐顯，周以多士隆。群靈感韶運，理翩應

翔風張生拔幽華、蘋蘩登二宮、未幾振朱錦、剖符撫西戎、及子仍同僚、贈言貽爾躬、威刑有時用、唯德可令終、

贈滎陽太守吳子仲

大晉盛得人、儲宮畜髦士、吳侯降高質、剖符授千里、垂覆豈他鄉、迴光臨桑梓、寮類感岐路、黎庶思知恥、老氏踰小鱗、曹叅寄獄士、無謂敝邑陋、覆簣由茲起、

答楊士安

逝將辭儲宮，栖遲集南畿。不悞百里賤，徒惜年
志衰。躊躇顧城闕，怨戀慕端闈。俊德貽妙詩，敷
藻發清徽。媿彼褒崇過，感此岐路悲。

送盧景宣

楊朱焉所哭，岐路重別離。屈原何傷悲，生離情
獨哀。知命雖無憂，倉卒意低迴。歎氣從中發，灑
淚隨襟頽。九重不常鍵，閭闔有時開。愧無貽衣
獻，貽言取諸懷。

迎大駕

南山鬱岑崓，洛川迅且急。青松蔭脩嶺，綠蘩被
廣隰。朝日順長塗，夕暮無所集。歸雲乘幘浮，淒
風尋帷入。道逢深識士，舉手對吾揖。世故尚未
夷，峭函方嶮澁。狐狸夾兩轅，豺狼當路立。翔鳳
嬰籠檻，騏驥見維繫。俎豆昔嘗聞，軍旅素未習。
且少停君駕，徐待干戈戢。

逸民吟

我顧傲世自遺，舒志六合由巢。是追沐浴洪池，
迅羽衣陟彼名山。採此芝薇，朝雲颺颺行露未

晞遊魚羣戲翔鳥雙飛逍遙博觀日晏忘歸嗟
哉四士從我者誰

釋奠詩

敦書請業研幾通理尊師重道釋奠崇祀德成
教倫孰云不祉

送大將軍掾盧晏

贈物雖陋薄識意在忘言瓊琚尚交好桃李貴
往還蕭艾苟見納貽我以芳蘭

贈汲郡太守李茂彥

離索何惆悵後會

闕二字

希河朔貴相忘岐路安

足悲

贈劉佐

要言將誰苦聊以貽友生念我二三賢規我無
隱情

本傳

潘尼字正叔，祖最，漢東海相。父滿，平原內史。並以學行稱。尼少有清才，與岳俱以文章見知。性靜退，不競唯以勤學著述爲事。著安身論以明所守。初應州辟，後以父老辭位致養。太康中舉秀才，爲太常博士。歷高陸令、淮南王允、鎮東叅軍。元康初，拜太子舍人。上釋奠頌，後出爲宛令。在任寬而不縱，恤隱勤政，厲公平而遺人事，入補尚書郎。俄轉著作郎，爲乘輿箴。及趙王倫篡。

位孫秀專政忠良之士皆罹禍酷尼遂疾篤取
假拜埽墳墓聞齊王冏起義乃赴許昌冏引爲
叅軍與謀時務兼管書記事平封安昌公歷黃
門侍郎散騎常侍侍中秘書監永興末爲中書
令時三王戰爭皇家多故尼職居顯要從容而
已雖憂虞不及而備嘗艱難永嘉中遷太常卿
洛陽將沒携家屬東出成臯欲還鄉里道遇賊
不得前病卒於塲壁年六十餘

史臣曰正叔含咀藝文履危居正安其身而後

動契其心而後言著論究人道之綱裁箴懸乘
輿之鑒可謂玉質而金相者矣
贊曰尼標雅性夙聞詞令

潘太常集終

潘太常集

卷全

三

潘太常集

卷全

傳

三

